



Na osnovu člana 3. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik BiH“, br. 25/04, 93/05, 48/07 i 15/08), člana 9. stav 3. Pravilnika o unutrašnjem sudskom poslovanju („Službeni glasnik BiH“, br. 66/12), člana 9. stav 3. Pravilnika o unutrašnjem sudskom poslovanju (Službeni glasnik RS“, br. 9/14), a u skladu sa preporukama Strukturiranog dijaloga o pravosuđu između Evropske unije i Bosne i Hercegovine i Mišljenjem Venecijanske komisije o pravnoj sigurnosti i nezavisnosti pravosuđa u Bosni i Hercegovini broj 648/2011 od 18.06.2012. godine, predstavnici Suda Bosne i Hercegovine, vrhovnih sudova entiteta i Apelacionog suda Brčko distrikta Bosne i Hercegovine, pod pokroviteljstvom Visokog sudskog i tužilačkog vijeća Bosne i Hercegovine, dana 10.04.2014. godine, donijeli su

P R A V I L A
panela za
ujednačavanje sudske prakse

I OPŠTE ODREDBE

Član 1.
(Predmet pravila)

Pravilima se uređuje uloga, sastav, način rada i druga pitanja koja su bitna za rad panela i ujednačavanje sudske prakse.

II ULOGA PANELA

Član 2.
(Ciljevi panela)

Panel za uspostavljanje kontinuiranog dijaloga između najviših sudskih instanci predstavlja platformu za ujednačavanje sudske prakse, kao i za diskusiju o drugim zajedničkim pitanjima s kojima se susreću.

Član 3.
(Uloga panela)

- (1) Kada postoji usaglašenost zakonskih odredbi, a različito tumačenje istih, panel će vršiti usaglašavanje stavova i donositi pravna shvaćanja.
- (2) Kada ne postoji usaglašenost zakonskih rješenja, koja stvara nejednakost građana pred zakonom, panel će po potrebi inicirati zakonske izmjene.
- (3) Na panelu se mogu razmjenjivati iskustva i mišljenja u tumačenju i primjeni zakona i u drugim situacijama, te predlagati odgovarajuća rješenja nadležnim institucijama.

Član 4.
(Koordinacija panela)

Panelom koordinira Visoko sudsko i tužilačko vijeće Bosne i Hercegovine (u daljem tekstu: VSTV BiH).

III SASTAV PANELA

Član 5.
(Opšti sastav panela)

- (1) Članovi panela su sudije Apelacionog odjeljenja Suda Bosne i Hercegovine, Vrhovnog suda Republike Srpske, Vrhovnog suda Federacije Bosne i Hercegovine i Apelacionog suda Brčko distrikta Bosne i Hercegovine (u daljem tekstu: Sudovi).
- (2) Panel se formira iz oblasti krivičnog, građanskog i upravnog prava.

Član 6.
(Članovi panela)

- (1) Članove panela odredit će predsjednici sudskih odjeljenja, u konsultacijama sa predsjednikom Suda za svaki sastanak panela.
- (2) Svaki Sud će odrediti najmanje jednog, a najviše tri člana za sastanak panela.
- (3) Lista članova panela se dostavlja Centru za sudsku dokumentaciju VSTV-a BiH.

IV SASTANCI PANELA

Član 7 .
(Održavanje sastanaka panela)

- (1) Sastanci panela se, u pravilu, održavaju u sjedištu VSTV BiH.
- (2) Sastanci panela mogu se održati i izvan sjedišta VSTV-a BiH, uz saglasnost svih članova panela i kada se za to steknu finansijski uslovi.
- (3) Sastanci panela se, u pravilu, održavaju svaka tri mjeseca.

Član 8 .
(Predlaganje tema)

- (1) Na sastancima odjeljenja Sudova predlažu se teme za raspravljanje na panelima.
- (2) Odjeljenje može predložiti teme koje su podobne za ujednačavanje sudske prakse, te teme koje je zbog složenosti ili nejasnog pravnog okvira potrebno raspraviti na panelu.
- (3) VSTV BiH može inicirati teme za raspravljanje na panelima.
- (4) Prijedlozi tema se dostavljaju Centru za sudsku dokumentaciju VSTV-a BiH, uz naznaku prioriteta i hitnosti.
- (5) Ako o određenoj temi nije usaglašen zaključak na sastanku panela ili tokom naknadnih konsultacija u okviru odjeljenja, tema se nominuje za naredni ili jedan od narednih sastanaka panela.

[Handwritten signature]

[Handwritten signature]

[Handwritten signature]

[Handwritten signature]

Član 9.
(Utvrđivanje dnevnog reda)

- (1) Prijedlog dnevnog reda utvrđuje Centar za sudsku dokumentaciju VSTV-a BiH, tako da se u prijedlog uvrsti, u pravilu, po jedna tema svakog Suda.
- (2) U prijedlog se uvrštavaju teme Sudova prema prioritetu i hitnosti.
- (3) Prijedlog dnevnog reda dostavlja se Sudovima na odobrenje.
- (4) Uz odobrenje na dnevni red ili prijedlog za izmjene i dopune istog, Sudovi dostavljaju imena članova panela i izvjestilaca za temu koju je predložio taj Sud.
- (5) Ako u roku od pet dana od dostave prijedloga dnevnog reda Sud ne dostavi komentare na dnevni red, smatrat će se da je sa istim saglasan.
- (6) Konsultacije o dnevnom redu vrše se elektronskim putem.
- (7) Predsjednik VSTV-a BiH upućuje pozive za održavanje sastanka članovima panela, uz utvrđeni dnevni red, najmanje 30 dana prije održavanja sastanka.
- (8) O sastanku panela obavijestit će se predsjednici Sudova.

Član 10.
(Izrada i dostava referata)

- (1) Izvjestilac o određenoj temi dostavlja referat Centru za sudsku dokumentaciju VSTV-a BiH najmanje 20 dana prije održavanja sastanka.
- (2) Referat treba sadržati obrazloženje spornog pitanja sa primjerima sudske prakse i prijedlogom zaključka.
- (3) Po primitku referata, isti se dostavlja elektronskim putem svim članovima panela radi adekvatne pripreme za diskusiju.
- (4) Ostali članovi panela svoje mišljenje o temi sastanka mogu dati u pisanoj formi (ko-referat) u roku od 10 dana od prijema referata. Koreferati će se takođe dostaviti drugim članovima.
- (5) Ako referat ne bude dostavljen u predviđenom roku, članovi panela će na sastanku odlučiti da li će se to pitanje razmatrati ili će se razmatranje odgoditi.

V NAČIN RADA PANELA

Član 11.
(Predsjedavanje panelom)

Sastankom panela predsjedava član panela po principu rotacije Sudova.

Član 12.
(Otvaranje i pretpostavke za rad panela)

- (1) Predsjedavajući otvara sastanak konstatujući da li su svi članovi panela prisutni, odnosno da li je svaki Sud zastupljen sa najmanje jednim predstavnikom, kako bi se ispunile pretpostavke za održavanje sastanka.
- (2) Predsjedavajući izlaže utvrđeni dnevni red, te po potrebi vrši njegove izmjene i dopune, na prijedlog i uz saglasnost članova panela.

[Handwritten signature]

[Handwritten signature] / *[Handwritten signature]* ³

Član 13.
(Tok sastanka)

- (1) Izlaganje referata, diskusija i usvajanje zaključaka odvija se prema usvojenom dnevnom redu.
- (2) O svakoj tački dnevnog reda predsjedavajući otvara raspravu nakon izlaganja referata od strane izvjestioca, te daje riječ diskutantima uvažavajući redoslijed javljanja.
- (3) Predsjedavajući vodi računa da predstavnici svih Sudova učestvuju u diskusiji.
- (4) Po okončanju diskusije za pojedinu tačku dnevnog reda predsjedavajući će zaključiti raspravu i precizno formulisati zaključke.

Član 14.
(Način odlučivanja)

- (1) Članovi panela se o zaključcima izjašnjavaju po principu jedan Sud, jedan glas.
- (2) Zaključci se donose konsenzusom svih Sudova.
- (3) Ako se ne može postići konsenzus o određenom pitanju, Sud koji je ostao u manjini izvršiti će dodatne konsultacije na sjednici odjeljenja i o odluci odjeljenja obavijestiti Centar za sudsku dokumentaciju VSTV-a BiH i ostale članove panela.
- (4) Dodatne konsultacije na sjednici odjeljenja će se izvršiti i ako Sud nema stav odjeljenja o određenom pitanju.
- (5) Ako je pri glasanju konstatovan jednak broj glasova za i protiv predloženog zaključka, tema se predlaže za naredni ili jedan od narednih sastanaka panela.

Član 15.
(Vrste zaključaka)

- (1) Panel donosi zaključak u formi usaglašenog shvatanja o određenom pravnom pitanju, koje se dostavlja na verifikaciju odgovarajućim odjeljenjima Sudova.
- (2) Nakon verifikacije na odjeljenjima, usaglašeno pravno shvatanje odjeljenja Sudova postaje pravno shvatanje panela.
- (3) Pravno shvatanje panela ima obavezujući karakter za Sudove, a upućujući za nižestepene sudove.
- (4) Panel može donijeti zaključak u formi inicijative nadležnim organima za donošenje ili izmjene zakona i drugih propisa.

Član 16.
(Izrada obrazloženja)

- (1) Po usvajanju zaključaka, panel će odrediti člana panela ili formirati radnu grupu koja će pripremiti obrazloženja uz zaključke.
- (2) Obrazloženje za zaključke iz člana 15. stav 3. Pravila sadrži razloge za usvojeno pravno shvatanje.
- (3) Rok za izradu obrazloženja je, u pravilu, osam dana od dana održavanja sastanka.

10.01.2012

Željko...

[Signature]

[Signature]

- (4) Obrazloženje zaključaka će se dostaviti svim Sudovima na verifikaciju.
- (5) Sudovi su dužni izvršiti verifikaciju u roku od osam dana od primitka obrazloženja.

Član 17.
(Dostavljanje i objavljivanje zaključaka)

- (1) Sudovi će pravna shvatanja panela sa obrazloženjem dostaviti nižestepenim sudovima iz svoje jurisdikcije. Zaključci i obrazloženja objavit će se za javnost putem web stranice Centra za sudsku dokumentaciju VSTV-a BiH.
- (2) VSTV BiH će zaključke iz člana 15. stav 4. Pravila dostaviti nadležnim organima.

Član 18.
(Izmjena pravnog shvatanja panela)

- (1) Ako odjeljenje Suda, usljed promijenjenih okolnosti, utvrdi potrebu za izmjenom pravnog shvatanja panela, inicirat će hitno održavanje sastanka panela.
- (2) Ako panel ne postigne saglasnost za izmjenu pravnog shvatanja, zaključit će da ne postoji usaglašeno pravno shvatanje Sudova o tom pitanju i postupiti u skladu sa odredbom člana 17. stav 1. Pravila.

Član 19.
(Objavljivanje sudskih odluka)

Sudovi će Centru za sudsku dokumentaciju VSTV-a BiH dostaviti sudske odluke kojima se potkrepljuje pravno shvatanje panela radi objavljivanja u bazi sudskih odluka.

VI TONSKI ZAPISI I ZAPISNICI

Član 20.
(Tonsko snimanje)

- (1) Tok sastanka panela snima se uređajem za tonsko snimanje.
- (2) Tonski zapis čuvat će se u Centru za sudsku dokumentaciju VSTV-a BiH.
- (3) Pristup tonskim zapisima imaju svi članovi panela, na zahtjev.

Član 21.
(Izrada zapisnika)

- (1) Zapisnike na sastancima panela vodi Centar za sudsku dokumentaciju VSTV-a BiH.
- (2) Zapisnik sadrži sažetak diskusija i rezultate glasanja, kao i zaključke koje je panel usvojio.
- (3) Zapisnik se u roku od osam dana dostavlja članovima panela elektronskim putem, te se usvaja na slijedećem sastanku panela.

Handwritten signatures and initials:
Dario L. R. Z3 hmn prof. 5 G. J.

(4) Usvojeni zapisnik potpisuju predsjedavajući panela i zapisničar, a čuvat će se u Centru za sudsku dokumentaciju VSTV-a BiH.

(5) Uz zapisnik se prilažu svi prateći dokumenti koji su služili kao osnova za raspravljanje o konkretnim pitanjima.

VII PRELAZNE I ZAVRŠNE ODREDBE

Član 22. (Izmjene i dopune Pravila)

Sva pitanja koja nisu regulisana ovim pravilima, regulisat će se zaključcima panela ili izmjenama i dopunama Pravila.

Član 23. (Stupanje na snagu i primjena)

Ova pravila stupaju na snagu danom donošenja.



Meddžida Kreso

Meddžida Kreso,
predsjednica Suda Bosne i Hercegovine



Amir Jaganjac

Amir Jaganjac,
predsjednik Vrhovnog suda Federacije Bosne i Hercegovine

Želimir Barić

Želimir Barić,
predsjednik Vrhovnog suda Republike Srpske



Damjan Kaurinović

Damjan Kaurinović,
predsjednik Apelacionog suda Brčko distrikta Bosne i Hercegovine



Milorad Novković

Milorad Novković,
predsjednik Visokog sudskog i tužilačkog vijeća Bosne i Hercegovine



Broj: 07-50-314-4/2014

Datum: 10.4.2014. godine